



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

**Widder die kelch Diebe**

**Bugenhagen, Johannes**

**Wittemberg, 1532**

**VD16 B 9473**

Beschlus.

**urn:nbn:de:hbz:466:1-34042**

mus nichts sein/ Auch mus bey euch nichts sein/ was die  
fromen vnd gehorsamen Christen gethan haben / nach  
dem befehl Christi/ vnd nach der Apostel lere/wie denn  
solchs Paulus bezeuget vnd die rechtschaffnen Historien  
darnach zc.

Ir müisset gewis der mal eins Gotte eine ernste re-  
chenschafft thun/für ewre lügen/Tyranny/betriegerey/  
morderey/ das wird euch denn zu schwer werden/wie  
im andern Psalm stehet. Widderkeren vnd busse thun/  
were das beste. Gott heut allen sundern sein gnade an  
jnn Christo/ Sūchet den HERRN/weil man in finden  
kan/Ruffet zu ihm/die weil er nahe ist/Seiner barmher-  
zigkeit ist kein ende/ **A M E N.**

Die Kirche odder Christenheit sey entschuldiget/die  
solch verbieten des Kelchs hat müssen leiden. Womit  
wollen sich aber die Tyrannen entschuldigen?

#### Beschlus.

Aus diesen schrifften lieber.V. Könnet jr wol verste-  
hen/das jr nicht Communiciren odder zum Sacrament  
gehen solt/ mit solchen Pfaffen/ die Christum vnd seine  
Christen lestern vnd morden vmb des Sacraments wil-  
len/Sie thun es nu nicht mehr aus vnwissenheit/das jr  
nicht theilhaftig werdet jrer grossen verdammis. Denn  
sol ich nicht gemeine kost essen/ mit den brüdern/ die  
schendlich leben/1. Corinth.5. wie sol ich denn jnn dieser  
heiligen sachen mit den offentlichen feinden Christi ge-  
meinschaft haben? Sie schelten offentlich Christum  
einen Ketzer/ vnd todten seine Christen/ vmb seines be-  
fehls willen. Gott behüte mich für jnen/die weil sie jnn  
solchem fürsatz vnd lesterung bleiben.

Ich

Ich als ein Christ/halte mehr vom ganzen Sacra-  
ment/ mir von Christo befohlen/ denn das ich widder  
Christus befehl mit sunden solt von den Gottlosen pfaf-  
fen/ das halbe Sacrament empfangen/ wie denn auch jr  
eigen Sabstrecht bekennet. Der mir die Tauffe alleine  
wolt geben im namen des Vaters vnd des Sones/ vnd  
wolt mir/ die dritte person inn der Gottheit/ den heiligen  
Geist mit falscher lere verleugnen/ von dem wolt ich die  
halbe Tauffe widder Christus befehl vnd widder den  
Christlichen glauben nicht nemen/ Also wil ich auch das  
halbe Sacrament von den Kelchdieben nicht nemen/  
wider Christus befehl. Ligen sie mir ia auff dem nacken/  
das ich das Sacrament nicht kriegen kan/ welchs mir  
doch Christus befohle hat/ so wil ichs Gott klage/ als die  
frome Jüde im reich Israel/ die nach Gottes befehl nicht  
kuntten gen Jerusalem komen/ die weil Jeroboam der  
Gottlose König das nicht alleine verbot/ sondern verle-  
get auch die wege/ vnd erwürget mit seinen Gottlosen  
Pfaffen die jenige/ die Gottes befehl wolten gnugthun/  
Doch wil ich darumb nicht on Sacrament bleiben/ wenn  
vnd wo ich dasselbige haben kan.

Ich wil nicht thun/ wie etliche/ die gantz dauon blei-  
ben/ gleich als müge man wol vnter den Christen/ Chri-  
stus befehl verachten. Nein/ nein/ nicht also/ sondern ich  
wil rat vnd hülffe suchen/ das ich das Sacrament Chri-  
sti vberkome nach seinem befehl/ so bald ich kan/ wie den  
zu ihener zeit die fromen Jüden thaten/ vnangesehen/ die  
Tyranny Jeroboams vnd seiner Gottlosen Pfaffen/  
wie man denn auch lieset von dem fromen Tobia. Tobi. 1.  
Wir haben gelauffen vergeblich zu S. Jacob/ gen Rom  
etc. da war vns kein weg zu ferne/ da wir im irthum wa-  
ren. Ey so sollen wir nu auch vleis furwenden/ so wir  
Christen

Christen sind vnd Christus befehl nicht verachten/ das wir das Sacrament vberkomen. Das Euangelion hat nu/ Gott lob/ guten raum vberkomen/ wir dürffen nicht Klagen/ als seien wir alleine Christen etc.

Etliche wöllen sich widder Christus befehl/ mit den Locis Philippi behelffen/ aber es gilt nicht/ das man sich Gottlos trösten wil mit vnsern schrifften/ widder Gottes wort/ Vnsere geschrifte sollen vns alleine zu Gottes wort furen. Was vnser Philippus Melanchthon im ernst vnd Christlich helt/ von beiderley gestalt/ das liese inn der vnterrichtung der Visitatoren/ denn das buch hat Philippus geschrieben/ vnd inn vnser Bekenntnisse für K. M. zu Auspurg/ auch inn der Apologia/ das selbst K. M. vberantwortet / welche Apologia Philippus auch geschrieben hat. Da haben wir ein Bekenntnis gethan/ Gott gedanckt/ die alle pforten der hellen nicht sollen umbstossen. Die Pfaffen dürffen vns nicht mehr mit vnrechter lere vnerschemet vnd lügenhaftig verklagen. Inn der Bekenntnisse ist alles genugsam verfasst/ was wir leren.

Hiermit/ lieber. V. habe ich euch vnd andern vnsern brüdern/ die solchs begeren/ willig gedienet/  
Bitt Gott für vns/ dem seid befohlen  
inn Christo Ihesu vnserm lieben  
HERRN ewiglich/ Amen.  
Geschrieben zu Lübeck  
M. D. XXXij.  
Octana Epiphanie.

Bedrückt zu Wittenberg durch  
Dans Lufft.